

纪晓岚诗文集

一函
四册

山陰湯壽潛螯先氏選輯
會稽蔣抱玄箸起氏點校

精選
紀曉嵐詩文集

上海華普書局印行

恩綸

嘉慶十年二月十五日

諭曰。協辦大學士禮部尙書紀昀。學問淹通。辦理四庫全書。始終其事。十有餘年。甚爲出力。由翰林洊歷正卿。服官五十餘載。本年正月。甫經擢襄綸閣。晉錫宮銜。遽聞溘逝。深爲軫惜。著如恩賞。給陀羅經被。派散秩大臣德通。帶同侍衛十員。前往賜奠。並賞廣儲司庫銀五百兩。經理喪事。其任內降革處分。悉予開復。所有應得卹典。該衙門察例具奏。欽此。

諭祭文

三台位亞軫。夙望於元臣。六藝身通。眷方聞於耆宿。藉大廷之日贊。新恩方賁黃麻。愴夜壑之風淒。遺疏遽聞綠野。憫茲篤棐。薦以馨香。爾原任太子少保協辦大學士禮部尙書紀昀。稟性淵通。立身醇謹。居藩國傳經之地。業富縑緗。入崇臺市駿之場。羣空驪駘。鑾坡載筆。是云克稱其官。黼辰書名。聿見能殫厥職。才程山右。登唐魏之民風。學董閩中。衍游楊之道脈。備從臣而格躋常調。轉儲隸而品擢清班。惟銅龍資審諭之才。斯竹馬寢承宣之命。雁銜綬帶。寵賁儀章。鳳刷羽毛。榮留欽矚。迨獲譴而郭乘玉塞。復承恩而詔待金門。嘉其綜括之多能。畀以校讐之專責。爾則潛心考索。銳意鈎稽。能探濠上之五車。不數河東之三篋。銀根勘誤。玉格搜奇。大典編成。削藁溯昭陽之歲。全書表進。臚函志元默之年。集排總目以精詳。簿續中經而賅洽。

佐天文之成化。千萬禩無此鉅觀。頌聖主之得賢。一二臣有茲盛遇。以此恭勤之茂實。宜邀優渥之殊施。由端尹而進直鸞臺。自貳卿而總司烏府。威生白簡。西垣誇五入之榮。度著青儀。南省懋再遷之績。上明光而曳履。入建禮以鳴騶。桃李真屬之春官。甲兵亦修夫夏職。金繩衍策。載襄堯典之粵稽。玉檢披華。重紀周官之董正。經猷益裕。資望兼隆。屬以調鼎需賢。卜甌進秩。方賴元勳之平格。用資朝列之楷模。何拜命之甫旬。竟頽齡之莫駐。綬之經被。賻以帑金。爰思絳服之庸。爲啓雕筵之奠。嗚呼。老成頻謝。空期壽考之無遺。文獻猶存。佇見德言之不朽。式頒綸綍。用慰幽靈。

御賜碑文

朕惟眷隆耆碩。樹峻望於朝端。恩備哀榮。表遺徽於身後。典三禮已逾十載。掌故頻徵。贊百揆未及。兼旬履聲遽杳。文披豐碣。色煥幽臺。爾原任太子少保協辦大學士禮部尙書紀昀。稽古淹通。致身靖獻。求惟實是。河間家有藏書。舉輒先登。日下名無虛士。階基清貫。班歷華資。遂荷先帝特達之知。獨蒙學問素優之譽。一麾出守。劇任恐掩佳才。四品加銜。殊恩特邀破格。嗣瑤華之遠貢。正玉局之宏開。美富羅四庫之儲。編摩出一人之手。紅梨照院。校讎夜逮於丙丁。青鏤濡毫。品第月呈其甲乙。徧搜浩博。隻字刊譌。別採菁華。片言扼要。似此集成。今古備冊府之大文。皆其宣力始終。盡儒臣之能事。洵叨異數。儕懋賞於內廷。不囿常資。預升庸於上列。講帷甫侍。端尹旋躋。俄待制於西班牙。綸敷丹闕。繼襄猷於南省。綬綰金章。烏署提綱。儼威棧以

持霜簡。青雲晉秩。領俊采而直冰廳。凡國家典禮攸行。胥宗伯直清是矢。有嘉謨足資辰告。位稱大儀。雖碩學難折辛卿。望孚僉議。屢司文柄。三典春官。鑑秉虛公。市近而門如水。體崇雅正。耄及而眼無花。比者重簡耆臣。與參政府。宣麻纔下。方資翊贊之勤。遺疏倏聞。遽愴淪殂之速。詢茲黃髮。服官夙著成勞。鑒厥丹忱。軫舊宜盼殊賚。旣飾終以賜祭。復褒美以易名。敏而好學。可爲文。固實華之並茂。授之以政。無不達。矧齒德之兼尊。式被嘉稱。用彰令範。嗚呼。池棲鳳老。聽鳴翻者有年。達返鴻冥。惜羽儀於此日。回思風度。宛如趨省而垂紳。尙有典型。自合表阡而樹石。俾貽奕禩。罔替欽承。

精選

紀曉嵐詩文集卷首

清河間紀曉嵐先生著

紀文達公事略

乾隆三十有八年。純皇帝特開四庫全書館。以河間紀公爲總纂官。公貫徹儒籍。旁通百家。凡六經傳注得失。諸史異同。子集支分派別。以及詞曲醫卜之類。罔不抉奧提綱。淵源竟委。每進一書。仿劉向曾鞏例。作提要冠諸簡首。上輒覽而善之。又奉詔撰簡明目錄。存書存目。多至萬餘種。皆公一手所訂。評隲精審。識力在王仲寶阮孝緒之上。藏諸七閣。裊然巨觀。真本朝大手筆也。公諱昀。字曉嵐。一字春帆。晚號石雲。世爲河間獻縣著姓。祖天申。有善行。歲饑。出粟數萬石。活人無算。父容舒。官姚安知府。先是郡爲九河入海故道。天雨則汪洋。

成巨浸。中夜輒有火光。公大父夢火光入樓中而公生。光遂隱。人以爲公實神物化身也。少奇穎。讀書目數行下。夜坐暗室。目閃閃如電光。不燭能見物。比知識漸開。光亦斂矣。乾隆丁卯年二十四。領順天鄉試解額。初闈中擬朱文正首卷。以公二場表儷語冠時。乃定公第一。而文正亞之。時阿文勤劉文正典試事。榜發皆以得人賀。二公復命。遂以二人姓名上聞。公與文正皆早受特達之知。職此故也。明年文正中第。公遲至甲戌成進士。選庶吉士。授編修。己卯典試山西。庚辰分校禮部試。辛巳京察記名。以道府用。壬午分校順天鄉試。提督福建學政。癸未遷侍讀。父憂歸。服闋補侍講。充日講起居注官。晉右庶子。戊子授貴州都勻知府。旋以四品服留任。擢侍讀學士。坐泄漏運使盧見曾事。謫戍烏魯木齊。辛卯召還。授編修。癸巳擢侍讀。總纂四庫全書。與內廷翰林一體宴賚。同事者爲陸副憲錫熊。陸侍郎費

墀而公實綜其成。綰書局凡十有三年。體例皆其所定。丙申。擢侍讀學士。直文淵閣。知起居注。己亥。擢詹事。晉內閣學士。壬寅。授兵部侍郎。仍兼直閣事。改任不開缺異數也。甲辰。充會試副考官。乙巳。晉左都御史。丙午。除禮部尙書。充經筵講官。戊申。賜紫。禁城騎馬。典武會試。自後爲總憲者五。長禮部者三。壬子。以畿輔水災。奏請截留南漕數萬石。設粥廠十。賑饑民。得旨。六月開賑。後增五廠。自季夏至明年四月。全活無算。嘉慶元年。丙辰。典會試。調兵部尙書。己未。典武會試。癸亥。六月。壽八十。上遣官賁上方珍物賜之。命教習庶吉士。是年。奏婦女猝遭強暴。捆縛受污。不屈見戕者。例不旌表。臣謂捍刃捐生。其志與抗節被殺者無異。如忠臣烈士。誓不從賊。雖縛使跽拜。可謂之屈膝賊廷哉。請勅下所司議。與未被污者。略示區別。予旌表。下部議行。乙丑。正月。復調禮部。拜協辦大學士。加太子少保。管國子監事。二

月十四日。薨於位。年八十有二。有詔。紀昀學問淹通。由翰林洊歷正卿。擢襄綸閣。服官五十餘載。辦理四庫全書。始終其事。十有餘手。最爲出力。可賞陀羅經被。派散秩大臣。帶侍衛十人。前往賜奠。並賞白金五百兩。治喪。尋賜祭葬。予諡文達。公於書無所不通。尤深漢易。力闢圖書之謬。一生精力。備注於四庫提要及目錄。不復自爲撰著。今人所見狹。偶有一得。輒自矜。羶獲而不知。皆古人所已言。或爲其所已闢。公胸有千秋。故不輕著書。其所欲言。悉於四庫書發之。而惟以覺世之心。自託於小說裨官之列。其感人爲易入。自文集外。所著閱微草堂筆記。凡七種。中多見道之言。性坦率。好滑稽。有陳亞之稱。然驟聞其語。近詼諧。過而思之。乃名言也。在上前嘗以片語解紛。實錄館請甄敘。或言其過優。仁宗以問公。公不置可否。但云臣服官數十年。無敢以苞苴進者。惟戚友倩臣爲其先人題主或銘墓。雖厚幣輒

受之上。輒然曰。然則朕爲先帝推恩。何不可之有。某科考試差後。有宣布前列詩句姓名者。臺臣密以告。上召公問之。公頓首曰。如臣卽洩漏者。問何故。曰。書生習氣。見佳作。必吟哦。或記誦其句。出而欲訪爲何人手筆。則不免於洩漏矣。上含笑。事遂寢。少與朱文正公不相下。有文人相矜意。後見文正所爲文。大歎服。以爲向不知公。吾過矣。自後交誼。乃益摯云。

序一

古之君子。所爲既沒而言立者。非必皆致意於文詞也。天地民物之理。洞然於胸中。而不爲窈冥恍惚之辭。以欺世。其於朝章國故。則知之悉而言之詳。而又以其好善之誠。述一時之賢人君子。不苟同。不虛美。俾足以傳信於後。惟然。故無意於文。而其文之傳也益遠。我師河間紀文達公。以學問文章。著聲公卿間。四十餘年。國家大著作。非公莫屬。其在翰林校理四庫全書七萬餘卷。提要一書。詳述古今學術源流。文章體裁。異同分合之故。皆經公論次。方著於錄。嘗語人。自校理祕書。縱觀古今著述。知作者固已大備。後之人竭其心思才力。要不出古人之範圍。其自謂過之者。皆不知量之甚者也。故生平未嘗著書。嘗爲人作序記碑表之屬。亦隨卽棄擲。未嘗存藁。竊嘗考有

宋之世。詞臣撰述。若太平御覽。冊府元龜。文苑英華。最稱繁富。而纂修諸臣。或無專集之可紀。獨歐陽文忠公作唐書。司馬文正公作通鑑。而其文皆裒然爲集。則以二公之學問文章。固加人一等也。公雖不欲以文詞自名。而名之播於世者久。故自公之存。而館閣詩賦。南行雜詠。試帖。我法集。並爲世所傳誦。碑誌文字。請求者踵相接。公孫刑部郎中樹馨。手自輯錄。積久成帙。公薨四年。而樹馨居同知府君之喪。乃盡發向時所錄。及已梓行者。詩賦箴銘贊頌序記碑表誌銘行狀。類而次之。總若干篇。爲若干卷。題曰紀文達公遺集。後之人博觀之。提要而約求之。此集於以知公之生平。實有同於歐陽司馬。而遠媲乎古之立言者。其在斯乎。其在斯乎。受業陳鶴謹譔。

序二

從來大家之文。無意求工。而機趣環生。總由成竹在胸。故能揮灑如意。所謂風行水上。自成文章也。雖廟堂著作。辭尙體要。而理足以貫之。吾師紀文達公。天資超邁。目數行下。掇巍科。入翰苑。當時卽有昌黎北斗。永叔洪河之目。厥後高文典冊。多爲人捉刀。然隨手散失。並不存稿。總謂盡係古人之糟粕。將來何必災梨禍棗爲。及在翰林署齋戒。始於敬一亭上。得永樂大典。朱竹垞尋訪不獲已。云李白成襯馬蹄矣。不知埋藏灰塵中。幾三百餘年也。數月中。每於值宿之暇。翻閱一過。已記誦大半。乾隆三十七年。朱笥河學士。奏聞高宗純皇帝。勅輯永樂大典。並蒐羅遺書。特命吾師總纂四庫全書總目。俱經一手裁定。故所存者。惟此獨全。權之甲午。典試江左。曾贈一水波硯銘。

云。風水淪漣。波折天然。此文章之化境。吾聞之於老泉。讀此銘。吾師之爲文可知矣。茲公孫香林西曹克紹家聲。敬將平日檢存者。付梓壽世。得文集十六卷。經進詩八卷。古今體詩六卷。館課詩一卷。我法集一卷。以權之年甫弱冠。計偕北上。卽猥荷鑒賞。得廁弟子行者最久。屬權之爲序。憶受知後。立雪程門時。多聞緒論。吾師是再來人。曾有未經目之書。卽知有某人序某人跋。開卷絲毫不爽。是慧悟夙成。文其餘事也。然才力宏富。絕不矜奇好異。總以清氣運之。譬滿屋散錢。逐手八串。李杜之光燄。燕許之手筆。盡歸腕下。裒然一代文宗也。雖吉光片羽。想懷鉛握槧之士。得之不啻珍寶。可久奉爲標準。權之何敢以媿陋辭。嘉慶十七年歲次壬申孟秋月。賜進士出身經筵講官太子少保體仁閣大學士受業劉權之拜撰。

序三

我朝賢俊蔚興。人文鬱茂。鴻才碩學。肩比踵接。至於貫徹儒籍。旁通百家。修率情性。津逮後學。則河間紀文達公。足以當之。夫山川之靈。篤生偉人。恆間世一出。河間獻縣。在漢爲獻王封。國史稱獻王修學好古。實事求是。所得書皆古文先秦舊書。被服儒術。六藝具舉。對三雍。獻雅樂。答詔策。文約指明。學者宗之。後二千餘年。而公生其地。起家甲科。歷躋清要。高宗純皇帝。命輯四庫全書。公總其成。凡六經傳注之得失。諸史記載之異同。子集之支分派別。罔不抉奧提綱。溯源徹委。所撰定總目提要。多至萬餘種。考古必衷諸是。持論務得其平。光稽古之聖治。傳於無窮。準諸獻王之寫定周官。尙書禮記。孟子老子。厥功尤茂焉。國家舉大典禮。恭進頌冊。恭和聖製。御製諸作。皆